



■ BERSATU menegakkan keamanan dan kedaulatan negara — anggota-anggota tentera ini berlatih bersungguh-sungguh untuk menjayakan pertunjukan kebudayaan 'Malam Gema Wira'

yang akan diadakan di Stadium Negara, Kuala Lumpur pada 18 dan 19 September sempena menyambut Hari Angkatan Tentera. — Gambar Berita Harian oleh Lee Hon Yew.

Malam Gema Wira di Hari Tentera

KUALA LUMPUR, Ahad — Selaras dengan tema Hari Angkatan Tentera tahun ini, 'Rakyat dan Tentera Berpisah Tiada', satu persembahan kebudayaan yang melambangkan eratnya hubungan antara anggota-anggota pasukan keselamatan dan orang awam akan diadakan di Stadium Negara di sini pada 18 dan 19 September.

Dinamakan Malam Gema Wira, acara-acara persembahan tersebut akan menunjukkan anggota tentera, yang terkenal dengan disiplin keras dalam menjalankan tugas mempertahankan negara, juga mempunyai perasaan seperti rakyat biasa.

Di antara acara menarik ialah persembahan tarian 'Mahsuri' ala tentera termasuk silat dan permainan pedang dan sebuah pentomin yang melaungkan angkatan tentera adalah untuk rakyat dan sebahagian dari rakyat.

Kira-kira 400 anggota tentera, lelaki dan wanita, yang mengambil bahagian juga akan menghidangkan permainan pancaragam, tarian, nyanyian dan lakewak jenaka termasuk kawad patung dan tarian topi.

Persembahan tersebut, yang dibuka percuma kepada orang ramai, akan turut disaksikan oleh Yang di-Pertuan Agong dan Raja Permaisuri Agong serta pembesar negara pada 19 September.

Hari Angkatan Tentera, 16 September, akan disambut di seluruh negara dengan upacara meletak kalungan bunga di Tugu Peringatan Negara bagi memperingati anggota tentera yang gugur.

Pada hari yang sama, Perdana Menteri Datuk Seri Dr. Mahathir Mohamad akan merasmikan pembukaan institusi ketenteraan tertinggi di negara ini.

Bahan asal dari Arkib
Negara Malaysia